

TE HEHEURAA API

I neia i te piha neneiraa a te Ekalesia a Iesu Mesia i te Feia Mo'a i te Mau Mahana Hopea Nei, i Papeete, Tahiti, i te mau fenua Sotaiete, i te mau avae atoa. Te hoo, e piti farane i te matahiti hoê.

“Te faaroo nei matou e, ei taata maiti-mau-hia e te Atua na roto i te tohu, e te tuuraa i te rima o te feia toroa e tia'i, ia a'o atu i te Evanelia, e ia faatere i te mau ohipa no to'na ra toroa.”

Nu. 15.

Ditema, 1912.

Mat. 5.

Te Mau Taata i Parauhia e te Atua.

A RAVE noa'i tatou, oia hoi o tatou o te mau ekalesia i te anotau hopea nei, i te ohipa no te Evanelia, te feruri nei anei tatou i nia iho i to tatou parau-raa-hia, mai te ui mai ia tatou iho e, ua maiti-mau-hia anei vau e te Atua, e e mana anei to'u i te rave i te ohipa mo'a rahi no te Evanelia a Iesu Mesia? Ua ui mai anei tatou ia tatou iho e, ua parauhia anei te mau taata o te faatere i teie nei ekalesia, ta'u e haapao, e te Atua; e o te Ekalesia mau anei teie a Iesu Mesia? Ua tia roa teie nei mau uiraa, no te mea e rave rahi te mau huru haapaoraa i roto i te ao nei i teie nei anotaui, e ia feruri maite tatou i nia iho i te ite rahi, e te ohipa maere na te Atua, ua ite tatou e, aore roa Oia i faatia mai i te tahi mau ekalesia, huru ê te tahi i te tahi, ia tapitapi te mana'o o te mau taata nei, e ia mârô noa â ratou. Ua papaihia e, “E ere hoi te Atua i te tumu no te anoi noa, no te hau râ.” Kor. I, 14: 33. E ua parau atura Paulo e, “Hoê hoi Fatu, hoê faaroo, hoê bapetizo.” Ephesia, 4: 5. E no reira ua ite tatou e, ua faatiahia maira e te Atua te hoê noa iho ekalesia i te anotau hopea nei, e ua horoa maira te Atua

i to'na ra mana rahi i to te hoê ana'e haapaoraa, "ia riro tatou atoa nei ei taata paari i te faaroo hoê, e te ite hoê i te Tamaiti a te Atua."

E mea tia roa ia mana'o tatou e, ia rave noa'tu te hoê taata i te ohipa no te Evanelia, ua parauhia oia e te Atua, e ua noaa ia'na te mana rahi ia rave i taua ohipa mo'a ra. Ia rave noa'tura te tahi mau taata i te ohipa no te Atua ma te mana ore, e ma te parau-ore-hia e A'na, e haavâhia'i, e e faahapahia'i ratou e te Atua, e e tuuhia te utua ino i nia iho ia ratou ra. E rave rahi te mau taata, o tei na reira'i i te anotau tahito, e ua faaitehia te utua ino i noaa ia ratou i roto i to tatou Bibilia nei.

Te faaite mai nei te Bibilia i te ravea i parauhia'i te mau Peropheta tahito na te Atua, e te mau Aposetolo a Iesu Mesia, e i te ohipa rahi ta ratou i rave i roto i te ao nei, o tei farii-noa-hia e Iehova ra. Aita râ i papaihia te hoê parau, tei faaite mai ia tatou e, ua farii maira te Atua i te hoê noa iho ohipa iti, i ravehia e te taata mana ore, o tei ore i maiti-mau-hia e A'na ra. E hi'o tatou i te huru no te parau-raa-hia o teie nei mau tavini tahito na te Atua, ia ite tatou, mai te mea ua maiti-mau-hia anei tatou e te Atua ia rave i te mau ohipa no te Evanelia nei, e aore râ aita anei; e ia ite hoi tatou, mai te mea ua parauhia anei te mau taata, o te faatere i to tatou iho ekalesia e te Atua, e mai te mea ua noaa ia ratou anei te mana rahi o te Atua ia faatere i te Ekalesia mau a Iesu Mesia ra.

A hi'o na tatou i taua Peropheta mo'a ra, ia Noa, o tei "arohahia e Iehova ra", e tei faauehia e te Atua ia a'o atu i te parau tatarahapa i te mau taata hara rahi no to'na ra ui. Haapao ihora Noa i te parau na te Atua, e a'o atura oia i te parau tatarahapa ia ratou e hoê hanere matahiti, mai te faaite atu ia ratou e, e tae mai te diluvi, mai te mea eita ratou e fariu mai i te Fatu, e haapao i ta'na ra mau faaue-raa. Ua noaa ia Noa te mana rahi, e ua riro ta'na parau, mai te mea ra e, o te parau ia na te Atua iho. Ua tupu mau

te mau mea atoa ta'na i faaite atu i taua mau taata hara ra, e ia ore ratou i tatarahapa, ua paremo ratou e hope roa'e, maori râ o Noa e to'na iho utuafare; e ua tapeahia to ratou mau varua i roto i te tapearaa, mai reira mai â, e tae noa mai i te poheraa o te Mesia, no te mea ua parau atura Petero e, "I pohe na hoi te Mesia iho, * * o ta'na ia i a'o atu i te mau varua e vai i roto i te tapearaa, o tei ore i faaroo i mutaaiahora i te faaoromairaa roa o te Atua, a tia ai i te anotau ia Noa ra." Petero I, 3: 18-20.

Hoê â ia huru te parau-raa-hia o Aberama, te metua no te feia parau-tia. Ua paraparau maira te Atua, e fafau maira te Atua i te tahi faufaa, i te parauraa mai ia'na e, "E faariro hoi au ia oe ei nunaa rahi; e e haamaitai au ia oe, e faarahi atu vau i to oe i'oa, e e riro oe ei maitai: e o tei haamaitai ia oe ra, o ta'u ia e haamaitai; e o tei faaino ia oe ra, o ta'u ia e faaino: e ei ia oe e maitai ai te mau fetii atoa o te ao nei." Genese, 12: 2, 3. Ua parau-atoa-hia o Isaaka e te Atua ei tavini na'na ra, ia rave i te ohipa maitai i roto i te ao nei. Ua fâ maira Iehova ia Iakoba, a taoto ai ona i nia iho i te tahi ofai, i te maitiraa mai ia'na, e mai te fafau mai i te tahi faufaa ia'na ra. Genese, 28: 10-16.

Ua tae maira te re'o o te Atua ia Mose, na roto maira i te auahi, i te parauraa mai ia'na ei Peropheta rahi na Iehova ra. Ua horoahia maira te mana rahi no te Atua ia'na, e faauehia ihora oia e te Atua, ia haere atu i te fenua ra, i Aiphiti, e aratai ê mai i te mau tamarii a Iseraela i taua fenua ra, no roto mai i te tâtîraa, no te mea ua tae roa'tura to ratou oto i ô ra te Atua ra. Ua ite tatou i te parau-tia a Mose, e i te ohipa maere ta'na i rave ra, na roto i te mana rahi o te Atua. A hi'o na i Exodo, 3: 2-10.

Ua parau atura o Mose i te Atua, na ô atura: "E ere au i te taata parau, * * e mai mutaaiaho mai â, e re'o maromaroâ, e te maumau to'u." Faaue maira te Atua ia'na ia maiti ia Aarona, ei auvaha no'na, e ei tauturu ia'na i te raveraa i teie nei ohipa rahi, e ua na reirahia, e no reira ua

maiti-mau-hia Aaronā e te Atua na roto i te Peropheta ra, ia Mose, e ua noaa ia'na te mana no te Atua. Exo., 4:10-17.

Ia ite Mose e, ua fatata mai te hopea o to'na ra pue mahana i roto i teie nei ao, ani atura oia i te Atua ia maiti i te hoê taata, ei mono ia'na, ia aratai atu i te mau tamarii a Iseraela i te fenua ra i parauhia e te Atua. Ua parau maira te Atua ia Mose ia maiti ia Iosua, te tamaiti a Nuna, no te mea e taata parau-tia oia, e tei roto ia'na te varua; e faaue maira te Atua, ia tuu atu Mose i to'na ra pue rima i nia iho ia'na, mai te horoa atu i te mana rahi o te Atua ia'na ra. A taio na i Numera, 27: 15-23.

A hi'o na tatou i taua Peropheta rahi ra, ia Samuela, o tei parauhia e te Atua, ei Peropheta i roto i Iseraela, i to'na apîraa. Ua tiaoro maira te Atua ia'na, i te na taime e toru, a taoto ai oia i roto i te fare no Eli, e ia ite Samuela e, o Iehova ia tei tiaoro mai ia'na ra, parau atura oia e, "E parau mai, te faaroo nei hoi to tavini." Ei reira, faaite maira te Atua i te mau opuaraa mo'a no'na ra i taua tamaiti ra, ia Samuela. E ua papaihia te parau e, "Tupu atura Samuela, e ua ati maira Iehova ia'na, e aore roa te hoê parau a'na i ore i te tupu ia'na. Ite a'era Iseraela atoa, mai Dana mai, e tae noa'tura i Bere-seba e, ua riro mau Samuela ei Peropheta na Iehova." Samuela I, 3: 4-20.

Ua parauhia te Peropheta ra, o Isaia e te Atua i roto i te hoê orama, (A hi'o na i Isaia, 1: 1.); e no Ieremia, ua maitihia oia ei Peropheta na Iehova i mua'e i to'na fanau-raa mai i roto i teie nei ao. Ieremia, 1: 2-10. E te reira ia te huru no te parau-raa-hia o te mau Peropheta, e hope roa'e na te Atua, i te anotau tahito; e ua noaa ia ratou te mana rahi, e rave ihora ratou i te ohipa maere i rotopu i to te ao nei; e ua farii-noa-hia te mau mea atoa ta ratou i rave e te Atua ra.

Na Iesu iho i maiti i ta'na ra mau Aposetolo, e ua ite tatou e, e mana rahi to Iesu, no te mea ua tonohia maira oia no ô mai i te Atua ra. Maiti ihora oia ia Petero raua o Anederea, ei na Aposetolo, a ravaai atu ai raua i te roto ra, i Gali-

lea, mai te parau atu ia raua e, "A pee mai ia'u, e faariro vau ia orua ei ravaai taata." E ua na reira-atoa-hia o Iakobo raua o Ioane, a ene atu ai raua i ta raua na upe'a, e faarue ihora raua i te boti, e pee atura ia'na. E na reira te mau Aposetolo atoa a Iesu i te parauhia e a'na i taua anota-ra.

Ua parauhia Paulo ei Aposetolo na Iesu Mesia, i muri mai i to Iesu poheraa, a haere atu ai oia i te oire ra, i Dama-seko, e hamani-ino atu i te Feia Mo'a, e te mau tavini na te Atua i reira. Ua tae maira te re'o o te Fatu ia'na, i te na ôraa mai e, "E Saulo, e Saulo, eaha oe e hamani-ino mai ai ia'u." Faauehia ihora oia ia haere atu i roto i te oire, ei reira e faaitehia te mau mea ta'na e rave. Ua faaue maira te Atua i te hoê pîpî, o Anania to'na i'oa, ia haere atu i te utuafare no Iuda ra, e faaora'tu ia Paulo. Feaa ihora râ Anania, no te mea ua ite ê na oia i ta Paulo hamani-ino-raa i te Feia Mo'a i Ierusalema, e faaite atura oia i te reira i te Atua. "Ua parau maira te Fatu ia'na, E haere oe, e farii-maite-hia hoi oia na'u, ia hopoi i tau i'oa i mua i te aro o te mau Etene ra, e i te hui arii ra, e i te tamarîi hoi a Iseraela ra." A taio na i Ohipa, 9: 1-31.

Ua horoahia maira te mana no te Atua i te mau Apose-tolo, e na roto i taua mana rahi ra, faaora ihora ratou i te feia ma'i; tatai atura i te mau demoni ra; e ua riro ia ratou te mau horoa'toa no te Varua Maitai. Ua parau atura Iesu ia ratou e, "Ta outou e haamau i raro nei, e haamau-atoa-hia ia i te ao; e ta outou e tuu i raro nei, e tuu-atoa-hia ia i te ao."

No teie nei mau mea, ua ite tatou e, eita e tia i te hoê taata ia a'o atu i te Evanelia a Iesu Mesia, e ia rave i te mau ohipa no taua Evanelia ra, maori râ ua maiti-mau-hia oia e te Atua. E au maitai roa te parau ta Paulo i parau atu no te tahu'a rahi, i te mau toroa'toa o te Ekalesia nei. Te na ô mairata'na parau: "E aore roa e taata e rave noai teie nei tura no'na iho, maori râ o tei parauhia e te Atua, mai ia Aarona ra." Hebera 5: 4. Ua faaitehia i mua nei te ravea i parauhia'i Aarona, oia hoi, ua parauhia oia e te Atua, na roto maira i te Peropheta ra, ia Mose.

Ua parauhia te Peropheta ra, o Iosepha Semita, e te Atua i te anotau hopea nei, ia rave i te hoê ohipa maere rahi roa, e ua maitihia oia ei Peropheta na Iehova i to'na apîraa,

mai i te Peropheta ra, ia Samuela i te huru. I te hoê ahuru e ma maha o to'na ra matahiti, a pure atu ai oia i te Atua, ua fâ maira te Atua e o Iesu Mesia ia'na ra. Ua paraparau ihora Iesu ia'na, mai te faaite mai ia'na e, aore roa te Ekalesia mau i nia iho i te ao nei, e ua maitihia oia ei mauhaa i roto i te rima o te Atua ia faatia mai i te Ekalesia mau a Iesu Mesia, e ia faatupu i te mau opuaraa mo'a a Iehova ra. Ua parau maira Iesu ia'na e, Te haafatata noa maira to te mau ekalesia o te ao nei ia'u, ma to ratou vaha, e te parau, tei te atea ê râ to ratou aau; "e hoho'a paiete hoi to ratou, o te puai râ o te reira ra, ua hunahia ia ia ratou." No te mea aita ratou i parauhia e te Atua, e aita i arataihia e te Varua Maitai, e aita i noaa ia ratou te mana no te Atua ia rave i te ohipa rahi no te Evanelia a Iesu Mesia.

Ua tupu Iosepha i te rahiraa, e e rave rahi te mau melahi, o tei fâ maira ia'na, no ô mai i te Atua, mai te faaite mai ia'na i te hinaaro o te Atua, e te mau ohipa ta'na e rave; e mai te horoa maira i te mau taviri atoa no te basileia o te Atua i te anotau hopea nei ia'na ra. I te mahana 15 no Me, 1829, a pure atu ai Iosepha raua o Olive Taudere i te Atua, ua fâ maira te hoê melahi, no te ra'i mai, ia raua. Ua faaite maira oia e, o Ioane Bapetizo ia to'na i'oa, e faatoroa maira oia ia raua i te Autahu'araa o Aaron. I muri iti a'era i te reira, ua tae maira o Petero, e o Iakobo, e o Ioane, na Aposetolo a Iesu Mesia, e faatoroa maira ratou ia raua i te Autahu'araa o Melehisezekia, ei reira ua noaa ia raua te mana rahi no te Atua ia faatia mai i te Ekalesia mau, e ia rave i te mau ohipa no te Evanelia mau a Iesu Mesia ra.

E hoa ino ma e, te parau atu nei matou e, tei ia matou ana'e te Evanelia mau, e te mana no te Atua i te anotau hopea nei. Ua parauhia matou e hope roa'e e te Atua, mai ia Aaron, oia hoi na roto maira i te mau Peropheta mo'a na Iehova, e mai ta Petero i parau atu i te mau taata i Ierusalem, i te mahana Penesekose, te parau atoa'tu nei matou i to te ao atoa nei e, "E tatarahapa, e ia bapetizohia outou atoa i roto i te i'oa o Iesu Mesia ia matara te hara, e horoahia mai ia te Varua Maitai ia outou. No outou hoi tei parauhia maira, e no ta outou tamarii, e no te feia atoa hoi i te atea ê ra, ta te Fatu, ta to tatou Atua e parau atu."

—OLE PETESONA.

Te Parau Tuatapapa no
Iosepha Semita.

(TUATIRAA.)

PENE XXVII.

MATAHITI 1838.

Ua haamata te hamani-ino-raa hopea i te Feia Mo'a i Misouri. Haavî ihora e hoê ahuru ma pae taata mâta'u ore i te mau taata mâta'u rahi, e hoê hanere, e pae ahuru. Ua pari-haavare atura te na taata ra, o Penisona raua o Balaka i te Peropheta. Ua tapeahia Iosepha raua o Limana Uaita, e ua aufauhia'tura te tahi moni no raua. Tairuru ihora te enemi.

E TEIE nei, e tae to tatou parau tuatapapa i nia i te mau mea ri'ari'a, i haamata i te tupu i te avae ra, i Atete, 1838, e tei ore i hope, e tae noa'tu i te matahiti 1839—te taime i tiahihia ê atura te Feia Mo'a i te fenua ra, i Misouri. I taua taime ihora, faaite noa'tura te tahi mau taata i te mau opuaraa iino, tei roto i to ratou mau aau, e no te ohipa ino ta ratou i rave ra, ua noaa i to ratou mau varua te vahi ino i roto i hade; area râ faaite noa ihora te tahi mau taata, e te mau vahine i to ratou faaoromairaa roa i te mea iino no te parau mau, e no te ohipa maitatai i ravehia e ratou ra, ua noaa ia ratou te hoê parahiraa i rotopu i te feia parau-tia na te Atua.

I taua taime ra, i taiohia'i te numera no te Feia Mo'a, e hoê ahuru ma pae tausani taata, e te parahi ra te pae rahi no ratou i te na mataeinaa ra, i Calavela, e i Daviesa, e i Carola. I te mahana 6 no Atete, 1838, i maitihia'i te mau taata toroa no Misouri, e haere atura na taeae e hoê ahuru ma pae i te oire ra, i Galatina, i te mataeinaa ra, i Daviesa, e tuu atu i ta ratou parau i te maitiraa i taua mau taata toroa ra. Te tamata'tura te hoê enemi tahito no te Feia Mo'a, o Viliamu Penisona to'na i'oa, i te mau i te hoê toroa, e ia tae mai te na taeae, tia maira oia i nia, e patoi puai atura i to ratou tuuraa i ta ratou parau i taua maitiraa ra. Ua tamata'tura te tahi mau hoa taero no'na ra, i te tiahi ê atu i te mau taeae; moto puai ihora râ te mau taeae ia ratou ma to ratou mau rima. Ua haaparuparu-rii-hia te tahi pae

no ratou, haavî ihora râ ratou i te mau taata no Missouri, e hoê hanere e pae ahuru te rahiraa, e haere atura ratou i to ratou mau fare e tii atu i ta ratou mau pupuhi. Ia iteahia e, te haaputuputu maira te enemî, haere oioi atura te mau taeae i to ratou ihora mau fare, e tahuna atura i ta ratou mau vahine, e te mau tamarii i roto i te aaihere, e tiaî ihora ia ratou, i roto i te ûa, e ao noa'ê te rui.

Ua tae atura te parau haavare i Fa Wese, i te poipoi i muri iho e, ua taparahi atura te enemî i te tahi mau taeae, e e ore roa ratou e horoa mai i to ratou mau tino pohe. Ua haaputuputu Iosepha i na taata maitatai e piti ahuru, e haere oioi atura ratou i te mataeinaa ra, i Daviesa. Ia faaroo râ ratou e, aita i pohe te hoê noa iho taata, î roa ihora ratou i te oaoa; haere noa'tura râ ratou, mai te opua i te tauturu atu i te Feia Mo'a.

Ua farerei atura ratou i te mau taata toroa no taua mataeinaa ra, i te vahi i parauhia Adamu-onidi-Ahmana, e fafau ihora i te tahi faufaa no te hau ia ratou ra. I mua'ê i to ratou ho'iraa mai, haere atura ratou i te fare no Adamu Balaka, te haavâ no te hau. Ua ite ratou e, te tauturu atura oia i te enemî, e hinaaro ihora ratou ia a'o atu ia'na, ia rave i te mea tia i te Feia Mo'a. O oia ia te hoê taata o tei hoo atu i te tahi fenua i to tatou mau taeae, e mai te tahi atu mau taata i te huru, hinaaro ihora ona ia noaa faahou mai i taua fenua ra ma te moni ore. Paraparau maite atura ratou ia'na, mai te ui atu ia'na e, eaha ra ona i muri a'ê i te reira? Ua papai atura oia i te pahonoraa, i te na ôraâ'tu e,

"O vau, o Adamu Balaka, te hoê haavâ no te hau no te mataeinaa ra, no Daviesa, te faaite atu nei au i te feia i parauhia Moromona e, ia faatia vau i te mau ture no Missouri, e no te hau Amerika e tia'i, e aita roa vau i ati i te enemî no ratou, e e ore roa vau e na reira. Mai te mea eita te mau taata Moromona e haamani-ino mai ia'u, e ore vau e hamani-ino atu ia ratou ra. O teie te mahana 8 no Atete, 1838."

Adamu Balaka, H.H.

Aita roa te enemî i mauruuru i teie nei mau mea. Ua feruri ratou ia ratou iho e, "Nafea tatou i te tiahi atu i taua mau taata Moromona ra, e i te noaa faahou mai i to tatou fenua, mai te mea e faatia tatou i te faatupu i te hau ia ratou ra." No reira, haavare atura o Penisona i mua i te aro o te haavâ ra, o Ausina Kiga, mai te parau atu ia'na e, ua tae mai o Iosepha Semita, raua o Limana Uaita, i te mataeinaa ra, i Daviesa, ma te nuu rahi, e tiahi ê atu i te mau taata

tahito no taua mataeinaa ra. Ua tonovavehia'tura te mutoi rahi ia tapea'tu ia raua; maere ihora râ oia i te mea e, ia tae atura oia i te fare no te Peropheta, i Fa Wese, te tiaia noa ra Iosepha ia'na. Maere ihora taua mutoi rahi ra, ia ite oia e, e taata mamahu roa te Peropheta, e aita roa oia i tapea atu ia'na; parau atura râ oia e, eita e tia ia'na ia rave i te ohipa no taua toroa ra, maori râ i roto i to'na ihora mataeinaa.

Ua haamâ noâ ihora Adamu Balaka i to'na ohipa ino, ia hi'o atu Iosepha ia'na, ma to'na na mata aueue ore, e te anaana, o tei ite atu i te mau melahi, e i te Atua, Ia'na iho, ia ore te Peropheta i reira, e ia feruri oia, riri roa ihora oia ia'na iho, e imi noa'tura oia i te ravea e tahoo atu i te Peropheta. Ua parau haavare atura oia e, ua tae maira Iosepha, e e hoê hanere, e pae ahuru taata i to'na fare, e parau atura ratou e, e taparahi atu ratou ia'na, maoti râ e papai oioi atu oia i to'na i'oa i nia iho i te tahi parau na ratou.

O Liburana W. Boga ia te tavana no Missouri, e ia faaroo oia i te parau na Adama Balaka, faaue ihora oia, ia haere vave atu te mau faehau no Missouri e faatupu i te hau. Ua ite ihora Iosepha e, e haamou-roa-hia te Feia Mo'a i te reira huru ohipa, e no reira haere atura oia raua o Limana Uaita i te mataeinaa ra, i Daviesa ia haavâhia, ia ore ratou e hamani-ino-hia e taua mau taata ra.

I taua mahana ihora, i haamata'i Iosepha raua o Sidine Ritidone i te haapii i te ture, i raro a'e i te na taata ra, o Atahisona raua o Doniphana, o tei tarahuhia i te matamua ia paruru atu i te Feia Mo'a, na roto i te ture, i te haamata-raa o te peapea i Missouri. Na haapii ture roo maitai ia teie na taata, e na raatira ia raua no te mau nuu no Missouri. Ua mana'o ihora te Peropheta e, e mea maitai roa ia, ia ite i te ture no te fenua, no te mea ua haavâ-pinepine-hia oia.

Ua haapaohia te haavâraa i te mahana 7 no Setepa, e haamau atura o Balaka i te mau haavare atoa. Ua faaite atura te mau taata maitatai e, na taata hapa ore ia o Iosepha raua o Limana, e farii ihora te haavâ ra, o Kiga, i te reira i rapaeau i te haavâraa, area râ ia haamauruuruhia te enemi, tuu atura oia i te utua ra, e pae hanere dara, i nia iho ia raua, e ia aufauhia ia te reira, haere tiamâ atura raua i to raua na fare. E piti mahana i muri iho i te reira, ua iteahia e Viliamu Areda, te hoê raatira no te hau, e tootoru

taata i te afairaa'tu i te tahi mau pupuhi, e te mau ofai pupuhi, no ô mai i te mataeinaa ra, i Re, i te mau enemi i te mataeinaa ra, i Daviesa. Ua tapea ihora oia ia ratou, e ua faa-ere-roa-hia te mau enemi, ia ore ta ratou mau mauhaa tama'i i tae atu ia ratou ra.

Ua haaputuputu atura te mau enemi i te hoê vahi, i parauhia Milaporata, e parau haamâta'u noa'tura ratou i te Feia Mo'a. Opuia ihora te mau taeae ia paruru atu ia ratou iho, e ua faarirohia o Limana Uaita ei raatira no ratou. Ua tamata'tura te enemi i te mau huru ravea, ia haamata te mau taeae i te aroraa, ei reira e tauturu mai o Boga, tavana rahi no Missouri, ia ratou. Ua tapea ratou i te tahi mau taeae, e faaite atura ratou e, te hamani-ino-puai-hia ra te mau taeae e ratou. E ravea faufaa ore ia te reira, e no reira parau atura o Viliamu Diridena, te hoê haavâ no te hau e, aita roa o Tihoti A. Semita raua o Alasona Ripeli i faatia ia tapeahia, e ia arataihia'tu i mua i to'na haavâraa. Parau haavare ia te reira, area râ ua riro ia ei otoheraa na te tavana ra, na Boga, i te tonono atu i te nuu rahi i te mataeinaa ra, i Daviesa.

Ua tae mai o Doniphana na mua, e aratai atura oia i ta'na nuu i te puhapa no te enemi, e faaue ihora ia ratou ia haapurara. Ua parau maira ratou e, e na reira'i ratou; aita râ ratou i haapao i ta'na parau. Ei reira haere atura oia i te puhapa no te Feia Mo'a, e parau maira ratou ia'na e, e faatia ratou i te tapearaa i te mau taata, o tei hapa i te ture, e haere maite atu i to ratou mau fare, mai te mea e purara te enemi. E mea tia roa ia te reira, e ua mauruuru roa o Doniphana. I taua taime ra, tae maira te raatira ra, o Atahisona, i te mataeinaa ra, i Daviesa, e ia ite oia i te huru no te peapea i reira, papai ihora oia i te hoê leta na te tavana, mai te faaite atu ia'na e, eita e mahia efaatupuhia'i te hau. Faaroo noa ihora râ te tavana i te mau haavare i parauhia, e faaue atura oia, ia haere atu e toomaha raatira, e te nuu rahi roa. O Paraka ia te hoê raatira no ratou, e e enemi noâ oia i te Feia Mo'a, papai ihora oia i te hoê leta na Boga, i te faaiteraa'tu ia'na e, te tamata'tura te Feia Mo'a i te paruru ia ratou iho ana'e. Ua parauhia o Limana Uaita, e e piti ahuru atu â mau taata, ia tae atu i te haavâraa e haapaohia e toru hebedoma i muri iho, e te huru, ua faatupu-faahou-hia te hau i rotopu ia ratou ra.—OLE PETESONA.

Te Mau Parau Api.

Ua pohe a'enei te vahine ra, o Te Atua, i nia i te pahi ra, ia Moana, i te area i Fagatau, i Nuuhiva, e ua tanuhia oia i roto i te miti.

I te oire ra, i American Fork, i Utaha, i Amerika, ua tupu te hoê ahoaho ri'ari'a i te mahana 26 no Atopa i mairi a'enei. Te haere noa'tura te tahi pereoo auahi, e te haere noa maira te tahi, e ua û teie nei na pereoo auahi e piti, te tahi i te tahi, e pararî roa ihora. Ua pohe roa te hoê taata, e ua haaparuparu-roa-hia te tahi i roto i taua ahoaho ri'ari'a ra.

Ua hope roa te tama'i rahi i ropu i to Italia e to Turekia, e ua faatupuhia te hau i te avae ra, i Atopa i mairi a'enei, e ua riro te rê i to Italia. I taua taime ihora râ ua haamata te hoê tama'i rahi i ropu i to Turekia, e to te tahi mau hau nainai i pihaiho ia'na ra, oia hoi, o Monetenegero, e o Serevia, e o Heleni, e o Bulagaria. Ua amuihia teie nei na hau nainai e maha te tahi i te tahi, e tama'i noa'tura ratou i to Turekia. Ua haavî-faahou-hia Turekia e taua na hau e maha ra, e hinaaro ihora oia ia faatupuhia te hau i rotopu ia ratou ra, no te mea ua fiu roa oia i te tama'i.

I te mahana 2 no Novema i mairi a'enei, i roto i te hoê vero rahi, ua hurihia te hoê pahi auahi, o Cecilia to'na i'oa, i nia iho i te mato e ua tomo i raro i te moana. Ua tupu teie nei peapea i fatata i te oire ra, i Mantreal, i Canada, i Amerika, i nia i te roto ra, i St. Louis. Teie te rahiraa o te mau horopatete tei paremo, oia hoi, e hoê ahuru ma ono; e pohe roa ihora te taata, e te vahine, e te mau tamarii atoa hoi. Ua faaroo te hoê taata faaapu i te piiraa mai o taua mau taata i roto te pape ra, e ua haere oioi atura oia na nia i ta'na boti nainai, e faaora oia i na taata e toomaha, a tamau noa'i ratou i te tahi iri raau no taua pahi ra.

Ua tae atura te pahi ra, o Farani Patifiki, i Hikueru, e ua tuuhia te boti i raro i te miti. Na mataro toomaha e te taata hoo tao'a tei nia i taua boti ra, e ua hoe atura, e tae atura i pihaiho i te aau, e tia'i atura ia manina te miti. Amo a'era te miti matamua, e te piti, e tomo atura te boti, e amo atura te toru o te miti. Ua parau atura te taata i mau i te hoê faatere i to'na mau hoa e, e iriti ta outou mau hoe, a tuu i roto i te boti, e faaafaro vau i to tatou boti, e i taua taime ihora, ua tapoi maira taua miti ra, e ua tere atura te boti, e tae atura i nia i te aau. Ua fati ihora te hoe faatere, e tahuri roa'tu te boti i nia i te aau. Painu atura na mataro tootoru, e te taata hoo tao'a, o Made to'na i'oa, na te roto, e ua faaho'i-faahou-hia'tura o Made i tua mai i te aau, e pohe roa'tura. O na mataro râ, ua tiuhia mai ia e te tavana hau, afaihia'tura na Tupapati; e te boti ra, ua painu ia i tua, e te tahi mataro, e ua tere mai te pahi, e ua rave i te boti e i te mataro atoa. E poipoi a'era, iteahia ihora teie nei taata, o Made, na te mau taata no Hikueru i hopu, e ua afaihia i uta, e hunahia.

Ua tupu te hoê hurihurifenua rahi i te fenua ra, i Mexico, e ua faainohia te pae rahi o te oire ra, o Akopuloko, i te pae miti no taua fenua ra. Aita i pohe roa te hoê taata, e rave rahi râ, tei haaparuparu-roa-hia.

Ua pohe a'enei te tamahine aruaru ra, o Kahupogi a Mahiri, i te mahana 7 no Atopa, i Takaroa, e e hoê matahiti, e hoê avae ana'e to'na oraraa. E poheraa hanahana to'na, e ua hunahia oia i te 8 no Atopa. Ua pohe atoa te tamaiti a Tekeha, Tane to'na i'oa, i Takaroa. Ua fanauahia oia i te 11 no Atopa, e ua hunahia oia i Takaroa i te 12 no Atopa, 1912.

Ua manuïahia te avariraa pârau i te fenua ra, i Takaroa. Ua mana'o ihora te feia fenua e, e ere te tufaa pârau teie, i tuuhia a'enei, mai tei itea e ratou i na matahiti i mairi a'enei. Purara'tura te tahi pae i Takapoto, toe rii ihora tau taata rii noa iho. Ia tae râ i te taime hopuraa, ua navai roa te pârau i Takaroa, e ua iti to Takapoto. Ho'i oioi maira te mau taata no Takaroa, mai Takapoto mai. I te avae ra, i Setepa, ua noaa te hoê poe pârau ia Tane a Mauruuru, no Tauere, e ua hoohia ia Veronita, 1,500 farane, moni Farani. Ua noaa te hoê poe ia Tuhiva a Mohi, e teie te moni, 6,250 farane. Ua noaa te hoê poe ia Tehitiraoa, e teie te moni, 525 farane. Ua noaa te hoê poe rahi ia Manua a Tupakake, e te vai nei taua poe ra i roto i to'na rima i teie nei; poe ravarava maitai. Ua noaa te hoê poe i to tatou taeae ra, ia Taha Porutu a Tufariuuau, e te mana'o nei oia e hoo i teie nei poe i te moni, 4,000 farane. Poe ravarava anaana maitai.

I te mahana 5 no Novema, i mairi a'enei, ua haapaohia te maitiraa i te peresideni no te hau Amerika. Te tamata noa'tura na taata e tootoru i te mau i taua toroa rahi ra, oia hoi, o Wiliamu Tafa, te peresideni no Amerika i teie nei, e o Theodore Roseveleta, te hoê ia peresideni tahito no taua hau ra, e o Woduro Wilisona, te tavana rahi no te tufaa fenua ra, no New Jersey, i Amerika. E maha matahiti ia te taime i haapaohia e to Amerika, ei te tau no te hoê faatereraa, e ia pau te reira, haapao-faahouhia te maitiraa i te peresideni. I mua i te mahana no te maitiraa, haere noa'tura te mau taata paari no Amerika, i te mau mataeinaa atoa no taua fenua ra, e orero atu i te mau taata, mai te faaite atu i te mau mea maitatai no te taata ta ratou i hinaaro, ia riro te peresideniraa ia'na; e tamata noa'tura ratou i te faatupu i te hinaaro, i roto i te aau o te mau taata, i te tuu i ta ratou parau na taua taata ihora. I te reira iho â maitiraa, tei haapaohia i te mahana 5 no Novema i mairi a'enei, ua riro te rê ia Woduro Wilisona, e ua maitihia ihora oia ei Peresideni no te hau Amerika. Ia tae i te mahana 4 no Mati, 1913, e faaotihia te ohipa no to Tafa faatere-raa, ei reira e haamata o Wilisona, te peresideni i maiti-apî-hia, i te faatere i taua hau rahi ra.

Toae a Maire, Faaau Parau,

Rue Dumont d'Urville, Orovini, Papeete, Tahiti.

Frank J. Fullmer, Imprimeur,

Rue Bréa et de la rue Dumont d'Urville, Papeete, Tahiti.